

康熙四十四年四月十四日

賜經筵日講官起居注詹事府詹事兼翰林院侍讀學士加三級臣陳元龍

皇輿表

御製皇輿表序

粵稽在昔帝王體國經野莫不坐
撫輿圖協同倫軌所以禹貢山川
繫以州域職方風土辨乃井疆簡
牒之所陳詩書之所紀粲然其可
覩矣朕萬幾時暇加意問學自經

史而外凡可羽翼大猷兼資治理
者咸務旁搜博討觸類貫通顧循
覽地輿稱名屢易以今準古端緒
棼如考鏡之餘不能無遺憾焉從
來土壤有定建置無常上溯唐虞
下迄勝國閱四千餘年之久歷二

十三代之遙損益廢興難以具舉
可證據者莫如正史而正史復有
差訛至詳備者莫如通志而通志
更多附會一統之世沿革尚殊竊
據之秋紛糾益甚異同錯見名實
不符非極泝流窮源之力何以規

千載於目前臚方輿如掌上哉夫
從志體則此詳彼略間有缺遺從
表體則地緯時經期於徵信用是
特命儒臣仿史表例校讐編輯或
始分而後并或暫合而終離郡屬
統名縣稽實土總前史以鈎索彙

御
百派於同源信所謂若網在綱有

條不紊者也書成進御凡若干卷
名曰皇輿表仍製序簡端俾垂永
久豈獨畫疆析理較若列眉其間
都邑之變更控扼之形勝戰爭之
地利設險之遺規固有不踰席而

周知一展卷而畢照者則以是書
佐歷代地志之不逮用資治理其
庶幾歟

康熙十八年五月二十七日

御製增修皇輿表序

皇輿表一編肇成於康熙己未製
序卷端時置几案歷有年所顧原
編紀載沿革於郡縣特詳其地列
輿圖而未設有郡縣者槩未編入
朕惟國家統御方夏覆載之內視

御製增修皇輿表序

均一體外藩蒙古諸屬國自

祖宗朝後先收服次第歸誠迨朕臨御

以來蕃王君長歲時貢琛悉比內

地繡壤相錯不啻萬有餘里邇者

喀爾喀青海部衆稱臣嚮附土宇

益廓計其山川封域斥堠之所屆

分野之所屬皆按地而可考也至
於山陬海澨新隸職方者二十餘
年間建州樹邑往往而有又若朝
鮮交趾諸國之奉職惟虔邊徼土
目之革心效順亦從來志方輿者
所宜備載爰命儒臣更加增輯共

十有六卷書成特令刊梓用示來
茲於戲幅員延袤亦云廣矣而蕃
生息厚風俗之道則實資於廟堂
之經理朕開編循覽深念高卑險
易形勢不齊燥濕剛柔風氣各異
然而秉彝恒性遐邇皆同朕以一

身爲中外元元主惟是張官置吏
以牧民生禁暴設防以禦民患旣
鞠養之務徧尤教化之宜周早夜
孳孳無日不心通乎四海九州之
隱書不云乎自朝至于日中旻不
遑暇食用咸和萬民凡我後人覩

是編者知剏造之惟艱思懷柔之
不易則千百禩無疆之曆服其庶
克永荷天庥也夫

康熙四十三年五月二十八日

皇輿表成進

呈表

經筵日講官起居注翰林院掌院學士兼
禮部侍郎加一級臣喇沙里等誠惶誠恐
稽首頓首

上言伏以

玉曆膺符廓九圍於無外

金甌掌故閱千禩而彌新
粵稽方冊之舊聞
爰就輿圖之實錄
敬陳歲事上冒

宸嚴欽惟

皇帝陛下

德洽垂衣

化隆緼瑟

運天下於掌左史右圖

宥海內於心
屆南暨朔顧以疆分理析世遠
代更禹貢職方之陳山川不改蘭臺太史
之籍建置多殊

特諭儒臣以校讐俾正今昔之同異

臣

喇沙里

等祇承

休命廣輯羣編首唐虞以迄元明二十三代由
封建以逮郡縣四千餘年沿革必覈其歲
時離合務詳其統屬易圖爲表仿漢史序
系之文尊輿以

皇法春秋一統之義不遑夙夜幸底成書總計
得目錄一卷凡例一卷表十六卷恭寫進
呈竊念唐世撰十道之圖時經數載宋室修九
域之志朝歷一元蓋事繁則耳目難周而